

आकाशवाणी

खास-खास खबरें

1. भारत ते श्रीलंका नै रक्षा, ऊर्जा ते बपार आले खेत्तरें च सरबंधें गी मजबूत करने लेई महत्वपूर्ण समझौते पर दस्तखत कीते न। श्रीलंका दे राष्ट्रपति होरें प्रधानमंत्री मोदी होरें गी सर्वोच्च पुरस्कार मित्रा-विभूषण कन्नै सम्मानित कीता।
2. गृहमंत्री अमित शाह होरें आखेआ जे देश मार्च 2026 तगर माओवादी आतंकवाद थमां मुक्त होई जाग।
3. रामेश्वरम च कल प्रधानमंत्री नरेन्द्र मोदी होर आधुनिक पाम्बन पुल दा उद्घाटन करगन।
4. दिल्ली सरकार नै आयुष्मान भारत योजना गी लागू करी दित्ता ऐ। हर इक परोआर गी हर ब'रे थोने आली सेहत सुरक्षा गी दूना करियै 10 लक्ख रपे कीता गेआ ऐ।
5. जम्मू कन्नै लगा'रदी अंतर्राष्ट्रीय सीमा पर बीएसएफ नै इक पाकिस्तानी गी मारी मकाया ऐ।

<><><><><><>

PM-Srilanka

प्रधानमंत्री नरेन्द्र मोदी होरें अज्ज कोलंबो च श्रीलंका दे राष्ट्रपति अनुरा कुमारा दिशानायके हुंदे कन्नै दपक्खी गल्लबात कीती जेहदा मकसद दवै गोआंढिएं बश्कार रणनीतिक ते विकासात्मक भ्याली गी मजबूत करना ऐ। दौने नेताएं दी मजूदगी च रक्षा ते ऊर्जा नें बक्ख-बक्ख खेत्तरें च केई समझौते पर दस्तखत कीते गे न। श्रीलंका दे राष्ट्रपति अनुरा कुमारा दिशानायके होरें प्रधानमंत्री मोदी होरें गी मित्रा विभूषण पुरस्कार कन्नै सम्मानित कीता। श्रीलंका दे राष्ट्रपति होरें इस गल्लै गी फही पक्का कीता जे उंदा देश अपने खेत्तर दा इस्तेमाल भारत दी सुरक्षा जां खेत्तरी स्थिरता दे खलाफ कुसै बी चाल्ली कन्नै नेई होन देग। प्रधानमंत्री मोदी होरें आखेआ जे भारत दी गोआंढी देशें गी प्राथमिकता देने आली नीति ते सागर मिशनें च श्रीलंका दी महत्वपूर्ण थाहर ऐ। मित्रा विभूषण पुरस्कार बारे प्रधानमंत्री होरें आखेआ जे एह समाज 140 करोड़ भारतीएं दा समाज ऐ ते एह श्रीलंका ते भारत दे लोकें दे ऐतिहासक सरबंधे गी दर्शादा ऐ। प्रधानमंत्री मोदी होरें श्रीलंका च तमिल पाहर्टें दे नेताएं कन्नै बी मलाटी कीती। उनें अपनी सोशल मीडिया पोस्ट च दस्सेआ जे श्रीलंका दे तमिल समुझाय दे नेताएं कन्नै मिलने, उंदे कन्नै सदा खुशी आला मौका होंदा ऐ। उनें मतिल समुदाय गी एकीकृत श्रीलंका च समानता, समाज ते न्याह आले जीवप लेई भारत दे सरबंधे गी बी पक्का कीता।

<><><><><><>

Foreign Secretary

भारत दे विदेश सचिव विक्रम मिसरी होरें दस्सेआ ऐ जे श्रीलंका च पिछले ब'रे सितम्बर महीने च मजूदा राष्ट्रपति हुंदे औहदा सांभने मगरा प्रधानमंत्री नरेन्द्र मोदी होर पैहले विदेशी शासनाध्यक्ष न, जिंदी मेजबानी श्रीलंका दे राष्ट्रपति होरें कीती ऐ। एहदे शा पैहले श्रीलंका दे राष्ट्रपति होर अपनी पैहली विदेश यात्रा लेई भारत गी चुनेआ हा। विदेश सचिव होरें आखेआ ऐ जे दवै दौरे भारत श्रीलंका दे खास सरबंधें दे प्रतीक न।

<><><><><><>

HM Visit

गृह मंत्री अमित शाह होर कल खित्ते दे सुरक्षा हालात दा जायजा लैने लेई जम्मू-कश्मीर दे दौरे पर आवा'रदे न। इस मौके पर ओह सुरक्षाबलें कन्नै गल्लबात बी करडन। शाह हुंदे इस दौरे लेई सबै लोड़चदे बंदोबस्त करी लैते गेदे न। शाह होर अपने इस दौरे दरान जम्मू च बीजेपी विधायकें कन्नै बैठक लाने दे अलावा द'उं होर बक्ख-बक्ख सुरक्षा समीक्षा बैठकें दी बी प्रधानता करडन। इंदे चा इक बैठक एकीकृत कमान मुख्यालय ते दुई सलाना श्री अमरनाथ जी दी जात्तरा दे बारै च होग। इ'ने बैठकें

दरन मेद ऐ जे आतंकवाद—रोधी अभियानें, बन्ने पारा थमां घुसपैठ दे जतनें ते जम्मू—कश्मीर दे पूरे—पराते सुरक्षा हालात बारै बी चर्चा कीती जाई सकदी ऐ। तोआई श्री शाह होर श्रीनगर थमां करोड़ें रपें दिऐं विकास परियोजनाएं दा वर्चुअल ढंगै नै उद्घाटन ते नीह पत्थर बी रक्खडन।

<><><><><><>

Chhatisgarh-Amit Shah

केन्द्रीय गृहमंत्री अमित शाह होरें देश थमां अगले ब'रे दे मार्च म्हीने माओवादी आतंकवाद दा खात्मा करी देने गी परतियै पक्का कीता ऐ, ढंटेवाडा छत्तीसगढ़ च अज्ज बस्तर पंडम समापन समारोह गी संबोधत करदे होई गृहमंत्री होरें माओवादिएं गी अपील कीती जे ओह थेआर छोड़ियै राष्ट्र दी मुख्खधारा च शामिल होई जान। उनें छत्तीसगढ़ दी जनजातीय कलाएं ते दस्तकारिएं गी बढ़ावा देने आस्तै बस्तर पांडम दी सराहना कीती। उनें घोषण कीती जे अगले ब'रे सब्बने जनजातीय जिलें थमां कलाकार हिस्सा लैंगन।

<><><><><><>

Vaishnav-T.N- Visit

प्रधानमंत्री नरेन्द्र मोदी होर कल रामेश्वरम च नमें बनाए सुआरे गेदे आधुनिक पाम्बन पुलस दा उद्घाटन करगन। चेन्नई हवाई अड्डे दा इस बारे मीडिया कन्ने गल्लबात करदे होई केन्द्रीय रेल मंत्री अश्विनी वैष्णव होरें दस्सेआ जे एह उद्घाटन देश दे इतिहास च इक महत्वपूर्ण उपलब्धि ऐ। उनें दस्सेआ जे पाम्बन पुल देश दा पैहला वर्टिकल लिफ्ट समुंद्री पुल ऐ जेहड़ा तमिल संस्कृति ते प्रांतीय ते तमिल सभ्यता दा प्रतीक ऐ। उनें आखेआ जे पुल दी शानदार निर्माण शैली गी प्रधानमंत्री मोदी हुंदे मार्गदर्शन च तोड़ चाढ़ेआ गेआ ऐ। रामेश्वरम च कल ऐतिहासिक उद्घाटन आस्तै तैआरिएं गी मुकदा रूप देने लेई केन्द्रीय रेल मंत्री होरें अज्ज संजा गै रामेश्वरम पुज्जी जांगन। जित्थें 3 ज्हार शा मते पुलस कर्मी तैनात कीते गेदे न ते कल उद्घाटन समारोह मुक्कने तोड़ी इलाके गी नो फ्लाई जोन घोषत कीता गेआ ऐ।

<><><><><><>

Shri Mata Vaishno Devi

दुर्गा अष्टमी दे पवित्तर मौके उप्पर अज्ज श्री माता वैष्णो देवी जी दे दरबार च श्रद्धालुएं दा खरा मता रश दिक्खने गी लब्भा'रदा ऐ। ज्हारां—बद्धे श्रद्धालुएं माता रानी दा अर्शीवाद लैने लेई कटरा पुज्जा बी करदे न। कल मनाए जाने आहले राम नौमीं दे पवित्तर मौके उप्पर कटरा कस्बे च सुरक्षा सने होर दुए सब्भै बंदोबस्त करी लैते गेदे न। श्रद्धालुएं दी सुरक्षा लेई बाददू जांच नाके स्थापित करने दे कन्नो—कन्नी सुरक्षाबलें आसेआ नियमित गश्त ते सीसीटीवी कैमरें दे राहें बी निगरानी कीती जा'रदी ऐ। श्राईन बोर्ड नै सब्भने श्रद्धालुएं गी अपील कीती जे ओह सुरक्षाबलें कन्ने सैहयोग करदे होई अपनी बवस्थित जात्तरा लेई सब्भने दिशा—निर्देशों दी पालमा जकीनी बनान।

<><><><><><>

Delhi Govt.

राजधानी दिल्ली च आयूष्मान भारत प्रधानमंत्री जन आरोग्य योजना लागू करने लेई दिल्ली सरकार च राष्ट्रीय सेहत प्राधिकरण कन्ने इक समझौता पत्र पर दस्तखत कीते न। केन्द्रीय सेहत मंत्री जे.पी.नड्डा ते दिल्ली दियां मुख्खमंत्री रेखा गुप्ता होरें इस मौके मजूद हे। दिल्ली दे सेहत मंत्री पंकज कुमार होरें आखेआ ऐ जे इस स्कीम कन्ने हर परोआर गी हर ब'रे 5 लक्ख रपे दी सेहत सुविधा थ्होग। उनें दस्सेआ जे दिल्ली सरकार इस सुविधा च 5 लक्ख रपे दा होर बाद्धा करोग ते दिल्ली वासिएं गी 10 लक्ख रपे दी सेहत सुविधाएं हर ब'रे उपलब्ध होग। एह सुविधा सब्बने सार्वजनिक अस्पतालें ते पैनल च शामिल निजी अस्पतालें थमां देश भरै च उपलब्ध होग।

<><><><><><>

Pak Intruder Dead

जम्मू च अंतर्राष्ट्रीय बन्ने पर कल चिरे रातीं इक पाकिस्तानी घुसपैठिये गी बी.एस.एफ दे चोकन्ने जवानें मारी मकाया। बी.एस.एफ दे जम्मू दे पीआरओ मताबक बीएसएफ दे जवानें गी 4 ते 5 अप्रैल दी मझाटली रातीं आर.एस.पुरा सेक्टर च संदिग्ध गतिविध दा पता लगा। जिसलै घुसपैठिये ने अंतर्राष्ट्रीय बन्ना टप्पेआ ते चेतावनिं गी नजरअंदाज करी दित्ता तां सैनिकें उसी मारी मकाया। एह घुसपैठ दी कोशश अब्दुलियां बन्ने दी पोस्ट पर होई ही। घुसपैठिये दी पंछान ते ओहदे मकसद दा पता लाया जा'रदा ऐ। बीएसएफ दे प्रवक्ता नै आखेआ जे घटना गी लेइयै पाकिस्तान कन्नै सख्त विरोध दर्ज कीता जा'रदा ऐं तोआई पुलस नै घुसपैठिये दी लोथ पोस्टमार्टन ते होरने कनूनी औपचारिकताएं आस्तै भेजी दित्ता ऐ।

<><><><><><>

Properties Seized

जम्मू-कश्मीर च आतंकवाद दे समूलचे नास लेई रामबन पुलसै, आतंकवाद दा समर्थन करने आहलें दे खलाफ कानूनी कार्रवाई कीती ऐ। इक बड्डी गैह दे तैहत रामबन दे एसएसपी कुलबीर सिंह होरें दस्सेआ जे गूल इलाके च मोहम्मद शरीफ ते मोहम्मद युसुफ दिएं द'उं संपत्तिं गी गैर-कनूनी गतिविधिं दी रोकथाम आहले कानून तैहत जब्त कीता गेआ ऐ। एह दौनें जने, बन्ना पार करियै पाकिस्तान चली गेदे न ते उं'दिआं एह संपत्तियां आतंकवादी गतिविधिं कन्नै सरबंघत न।

<><><><><><>

Sakeena Reservation (byte)

आरक्षण नीति दे सरबंघै च जारी चैताएं गी हल करने दी इक कोशश दे तैहत समाज कल्याण मंत्री सकीना इत्तू होरें अज्ज अनंतनाग च इक संवाददाता सम्मेलन गी संबोधित करदे होई इस मामले गी पारदर्शिता ते संजीदगी कन्नै हल करने दी सरकार दी वचनबद्धता गी पही पक्का कीता। उं'नें आखेआ जे इस मामले दी जांच लेई खडेरी गेदी मंत्रिमंडल दी उप-कमेटी, इस सरबंघै च केई सारे डेलीगेशनें कन्नै मलाटी करोग। मुख्यमंत्री ओमर अब्दुल्ला हुंदी अगुवाई तैहत सरकार, सभ्मनें सरबंघत घड़ें कन्नै गल्लबात करने ते आरक्षण नीति च पारदर्शिता ते निरपक्खता जकीनी बनाने लेई पूरी चाल्ली संजीदा ऐ।

<><><><><><>

CS Drug Abuse (byte)

मुख्य सचिव अटल डुल्लु होरें केन्द्र शासित प्रदेश च नशीले पदार्थ दी माड़ी कवैतू बारै बड्डे-पैमाने पर जागरूकता अभियान रम्भने लेई तैयारिं दा जायजा लैने गितै जम्मू आहले सिविल सैक्रेटेरिएट च इक उच्ची सतह दी बैठक दी प्रधानता कीती। इस अभियान दा मकसद लोकें गी नशीले पदार्थ करी समाज ते सेहत पर पौने आहले माड़ेअसर बारै जानकार बनाना ऐ। इस मौके उप्पर सरबंघत डिप्टी कमिशनरें गी अभियान लेई कीती गेदी तैयारिं बारै जानकारी दित्ती गेई जि'दे च सूचना विभाग आसेआ चलाई जाने आहली हफतावार पॉडकॉस्ट श्रृंखला बी शामिल ऐ।

<><><><><><>